



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.475/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët: Kymete Kicaj kryesuese, Arsim Hamzaj dhe Skender Çoçaj-anëtarë, duke vendosur përkitazi me ankesën e subjektit politik Lëvizja Vetëvendosje (LVV), me seli në Prishtinë, paraqitur kundër subjektit politik Partia Demokratike e Kosovës (PDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme për Kuvendin e Republikës së Kosovës, në seancën e panelit të mbajtur më datë 11.02.2025, merr këtë:

VE N D I M

- I. PRANOHET e bazuar ankesa e subjektit politik Lëvizja Vetëvendosje (LVV), me seli në Prishtinë, Anr.475/2025 e datës 09.02.2025.
- II. Subjektit Politik Partia Demokratike e Kosovës (PDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, i shqiptohet dënimi më gjorbë në lartësi prej 3,000.00 (tremijë) euro.
- III. Detyrohet Subjektit Politik Partia Demokratike e Kosovës (PDK), që gjorbën e shqiptuar si në pikën -II-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

A r s y e t i m

Me datën 09.02.2025 PZAP ka pranuar një ankesë nga subjekti politik, Lëvizja Vetëvendosje (LVV), me seli në Prishtinë, në të cilën pretendohet se më 07.02.2025 aktivistët e Lëvizjes Vetëvendosje, Qendra në Drenas kanë vërejtur se kandidati i subjektit politik, Partisë Demokratike të Kosovës, z.Petrit Hajdari më datë 07.02.2025 për qëllime politike, elektorale ka mbajtur takim me përfaqësues të Bashkësisë Islame të Komunës së Drenasit, takim të cilin po ashtu e ka postuar në rrjetin social Facebook, me veprimet e tij kandidati i lartcekur për deputet ka shkelur dispozitat e nenit 5 paragrafi 2 nën paragrafi 2.4 i Rregullës Zgjedhore 07/2024. Më tutje duke u mbështetur në bazën ligjore dhe argumentet e lartcekura, ka kërkuar që masa e sanksionit të vendoset në përputhje me legjislacionin në fuqi.

Si provë parashtruesi i ankesës ka bashkangjitur foton e postuar në rrjetin social facebook.

PZAP-i, e njoftoi subjektin politik Lidhja Demokratike e Kosovës (LDK), për ankesën e paraqitur kundër tyre.

Në përgjigjen në ankesë të datës 10.02.2025, subjekti politik PDK ka theksuar se ankuesi me qëllim dhe duke qenë në njohuri se z.Petrit Hajdari, këtë fotografi e ka shpërndarë në rrjetin social Facebook më datë 06.02.2025, ka paraqitur fakte të rreme duke pretenduar se shpërndarja e këtij postimi është bërë më datë 07.02.2025, me qëllimin që panelin e PZAP ta vendos në lajthitje për vendosje meritore, ndonëse ankesa është paraqitur pas afatit të përcaktuar ligjor. Përmes përgjigjes në ankesë ka kërkuar që të hedhet si e palejuar ankesa e parashtruar nga subjekti politik LVV dhe të konstatohet se ankesa është parashtruar pas kalimit të afatit ligjor.

Paneli, pasi që shqyrtoj të gjitha shkresat e lëndës, konstatoi se:

Ankesa është e bazuar

Paneli pasi që shqyrtoi pretendimet ankimore dhe përgjigjen në ankesë, ka gjetur se kandidati për deputet nga radhët e subjektit politik PDK Petrit Hajdari në postimin e datës 07.02.2025 në llogarinë e tij të facebook-ut me qëllim të përfitimit të votave ka bërë fushatë me përfaqësues fetar (BIK) të Drenasit.

Nga prova materiale bashkangjitur ankesës, nga subjektit politik LVV dhe shkresave tjera të lëndës, paneli ka vlerësuar se nga ana e kandidatit për deputet Petrit Hajdari nga radhët e subjektit politik, PDK, është shkelur Rregulla Zgjedhore Nr. 07/2024 për Fushatën e Zgjedhjeve, Monitorimin e Fushatës së Zgjedhjeve dhe Deklarimin Financiar, pasi që kandidati në fjalë, me qëllim të promovimit të kandidaturës së tyre për deputet, kanë bërë fushatë zgjedhore me përfaqësues fetar, duke i përfshirë në fushatë zgjedhore përfaqësues fetar, veprim ky i cili bie në kundërshtim me dispozitën e nenit 5 paragrafi 2 nën paragrafi 2.4 i Rregullores Zgjedhore 07/2024 që përcakton se në fushatën zgjedhore nuk mund të përfshihen kategoritë e personave të punësuar në organizata bamirëse dhe fetare.

Andaj duke u mbështetur në nenin 117.3 të LZP-së ku përcaktohet se: “vendosja për ankesat nga PZAP-ja mbështetet në dëshmi të qarta dhe bindëse”, Paneli vlerësoj se pretendimet e lartpërmendura janë të qëndrueshme dhe si të tilla i pranoi si të bazuara, sepse kjo shkelje ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politike të jenë në një atmosferë të tolerancës demokracisë, paqes dhe respektit për sundimin e ligjit se nga veprimet e përshkruara në ankesë nga parashtruesi i ankesës paraqesin shkelje të dispozitave të lartcekura, dhe të njëjtën e pranoi si të bazuar.

Sipas vlerësimit të panelit pretendimet në përgjigje në ankesë se kandidati postimin e ka bërë më datë 06.02.2025 janë të pabazuara për arsye se në postimin në rrjetin social Facebook të kandidatit për deputet, vërehet se kandidati për deputet postimin e ka bërë para katër ditëve e që bie se postimi është bere më datë 07.02.2025.

Gjithashtu Paneli, me rastin e vendosjes së gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes, dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, se ky veprim i tyre përbën shkelje të legjislacionit zgjedhor. Kjo konsiston në faktin se subjekti politik PDK, ka qenë i

njoftuar me obligimet dhe përgjegjësit gjatë procesit të fushatës zgjedhore. Andaj përfshirja e kandidatit për deputet të subjektit politik PDK për fushatë zgjedhore duke u takuar me përfaqësues fetar është në kundërshtim me dispozitën ligjore të nenit 5 paragrafi 2 nën paragrafi 2.4 i Rregullores Zgjedhore 07/2024.

Nga arsyet e theksuar më lartë duke bazuar nenin 117 paragrafi 3, neni 118 paragrafi 1 dhe neni 120 paragrafi 1 nën paragrafi 1.3 të LZP-së, të LZP-së, dhe nenit 5 paragrafi 2 nën paragrafi 2.4 i Rregullores Zgjedhore 07/2024, paneli vendosi si në dispozitiv të këtij vendimi.

Paneli Zgjedhor për Ankesa dhe Parashtresa
Anr.475/2025 më datën 11.02.2025



Këshilla Juridike: Këshilla Juridike: Kundër këtij vendimi nuk lejohet ankesa konform nenit 118 par. 4 të LZP-së.